

**1293-1293- OFP - Acta Capitulum Generalium apud Insulas Celebrati**

In nomine patris et filii et spiritus sancti. Amen.

Acta capituli generalis apud Insulas  
celebrati anno Domini · M<sup>o</sup> · CC<sup>o</sup> · XCIII<sup>o</sup> ·

Confirmamus has constitutiones. In capitulo de studentibus. ubi dicitur. quinque autem provincie. deleatur totum usque ibi. Provincia. et dicatur sic. sex autem provincie scilicet. Hispania. Provincia. Lombardia etc. Et hec habet · iii · capitula.

Inchoamus has. In capitulo de ieiuniis. post illud. assumptionis sancte Marie. et Bartholomei. addatur. et nativitate beate virginis.

Item. In eodem capitulo. ubi dicitur. itinerantes tamen bis refici possunt nisi in adventu. addatur. et vigilia purificationis.

Item. In capitulo de rasura. ubi dicitur. rasura autem fiat hiis terminis. deleatur hoc totum usque in fine capituli. et dicatur sic. rasura vero fiat a pascha usque ad festum omnium sanctorum de quindena in quindenam. deinde autem semel in tribus septimanis. ita tamen quod propter festa solempnia possit per dies aliquot preveniri; vel retardari.

Item. In capitulo de electione prioris conventualis. ubi dicitur. si vero de alia provincia fuerit. post illud. admittantur ad electionem predictam. addatur. infra vero idem tempus non admittantur ad electionem electorum prioris provincialis. nec ad tractatum eorum. que mittenda sunt ad capitulum generale vel provinciale. Iste sunt admonitiones.

Volumus et ordinamus. quod fratres qui libros aut pecuniam a communitate provincie habuerunt. et iam non sunt habiles ad legendum vel studendum in eis; suo provinciali resignent et reddant. ut ex eis fratribus aptis ad studendum valeat providere.

Item. Inhibemus. ne mittant ad studia generalia insolentes et inquieti. et si qui tales reperti fuerint; per priorem conventus cum testimonio aliquorum discretorum eorum provincialibus intimetur. et ipsi eos ad suas provincias non differant revocare. Idem volumus circa eos qui ad studia theologie vel arcium infra suas mittuntur provincias observari.

Item. Inhibemus districte. ne aliquis frater artem medicine exercent. nec de medicina se aliquatenus intromittat. nisi prius in seculo audiverit et fuerit sufficienter instructus.

Item. Inhibemus districte. ne aliquis contrahat debitum sine licencia prioris sui. et qui secus fecerit; teneatur ieiunare una die in pane et aqua qualibet septimana; quousque satisfecerit creditori.

Item. Prohibemus. quod fratres non procurent nec petant. quod alii fratres eis attinentes vel alii quicumque eis post mortem in libris vel aliis rebus succedant. et quod tales gracia de cetero a prelati ordinis minime concedantur.

Item. Ad vitandum nimium discursum fratrum ad capitula generalia et provincialia; volumus et monemus. quod teneatur ordinatio in capitulis super hoc facta. addentes. quod tam priores quam alii fratres spectantes ad capitulum. mutuo se associant. exceptis diffinitoribus capituli generalis. et sociis sibi a capitulo deputatis. et visitoribus; qui poterunt secum adducere socios sibi datos.

Item. Mandat venerabilis pater magister ordinis. quod diffinitores vel socii eorum acta capitulum suorum provincialium singulis annis portent secum ad capitulum generale.

Item. Cum de alternandis capitulis generalibus facta sit pluries inchoatio. et interdum sequuta sit approbatio. et rationes appareant pro et contra; nolentes circa hoc aliquid attemptare. volumus. quod in singulis capitulis provincialibus huius anni super hoc diligens collatio habeatur. et quod visum fuerit singulis provinciis; mittatur ad sequens capitulum generale.

Item. Monemus. quod fratres non loquantur in mensa nec dent loquendi licenciam preter formam constitutionum. et nisi unde hoc sibi liceat. per literas apostolicas possint docere. et contrarium facientes; puniantur sicut transgressores.

Item. Ordinamus et volumus. quod fratres privati vocibus non admittantur ad aliquam electionem vel tractatum eorum. que mittenda sunt ad generale vel provinciale capitulum. nisi per acta vel per litteras docere se valeant restitutos.

Iste sunt penitencie.

Fratrem Gentilem de Roma<sup>1</sup> qui clam et sine magistri ordinis licencia. regendi Parisius in theologia licenciam accepit; denunciamus privatum voce et licenciam sic presumptam iudicamus irritam et inanem. inhibentes districte. ne quis de cetero simile aliquid attemptare presumat. Volumus insuper. quod magister ordinis diligenter inquirat de fratribus. per quos dicta licencia dicitur fuisse procurata. et eos privatos voce denunciaret. et nichilominus gravius puniat secundum exigenciam delictorum.

Item. Cum intellexerimus. quod quidam iuvenes studentes in conventu Pontensi proterve se habuerunt in tractatu de mittendis ad capitulum et pecierunt fratrem quemdam bonum transferri ad aliam provinciam.

imponimus provinciali Francie. quod diligenter de hoc inquireat. et quos reos invenerit; privet studio et amoveat a conventu.

Item. Fratrem Petrum Riperti Avenionensem. qui privatus voce. dum immineret electio prioris. dixit se fuisse restitutum per magistrum ordinis. cum non esset. legens restitutionem suam in cedula superposita littere magistri. que de alia materia loquebatur; privamus voce. et iniungimus ei · xii · dies in pane et aqua et quod per annum in singulis septimanis. in accusatione sua recipiat disciplinam.

Concedimus provincie Provincie; · ii · domos.

Provincie Francie; · i ·

Provincie Theotonie; · ii · unam ponendam in Liguibus<sup>1</sup> sine preiudicio alterius provincie. aliam in Vismaria. Absolvimus priorem provincialem Theotonie.

Item priores conventuales Ceno[ma]nensem. Trecensem. Belvacensem. Turonensem. etc. et ordinamus. quod iidem fratres in eadem provincia et in eisdem conventibus ad eadem officia non resumantur hoc anno.

Ista sunt suffragia pro vivis.

Pro statu universalis ecclesie et pro venerabili collegio cardinalium. et creacione summi pontificis; quilibet sacerdos · iii · missas etc.

Ista sunt suffragia pro defunctis.

Pro domino Iohanne Chauleti cardinali et legato Francie quondam; quilibet sacerdos · i · missam<sup>1</sup>.

Pro domino Helia de Malomonte decano sancti Aredii Lemovicensis diocesis. quilibet sacerdos unam missam. etc.<sup>2</sup>.

Summa pro vivis · lviii · summa pro mortuis; · xxvii · Item · iii ·

Noverint universi. quod frater Bernardus de Trilia quondam prior provincialis Provincie rediens de capitulo generali Romano; obiit antequam rediret ad conventum suum anno precedente · m<sup>o</sup> · cc<sup>o</sup> · xcii<sup>o</sup> · in vigilia beati Dominici in conventu Avenionensi. propter quod fratres tenentur ei ad suffragia consueta<sup>3</sup>.

Pro qualibet missa; clericus non sacerdos · vii · psalmos cum letania. conversus; · c · pater noster cum totidem ave Maria dicant.

Letania in profestis diebus more solito dicatur.

Committimus magistro ordinis ordinationem studii Parisiensis. et aliorum studiorum generalium. ut ipse de magistris et bacallariis ordinet et disponat prout utilitati ordinis et profectui viderit expedire.

Item. Volumus et iniungimus. ut diffinitores capituli presentis et futuri anni. in veniendo et redeundo deducantur de conventu ad conventum. et provideatur eis secundum modum ordinis. ut hactenus est servatum.

Sequens generale capitulum assignamus apud Montempessulanum in provincia Provincie. et diffinitores veniant dominica infra octavas ascensionis. Alii autem fratres intrare poterunt locum capituli feria · via · sequenti; et non ante.

Sentencias iudicum approbamus.

Actis additae sunt litterae magistri ordinis; cf. app. n. XLVIII.

<sup>1</sup> Lignibus, Ligniburne: legendum esse arbitror in Luzelburgo, qui conventus circa haec tempora fundatur. Cf. KOCH Das Dominikanerkloster zu Frankfurt am Main. Freiburg 1892, pag. 6.

<sup>2</sup> Idem legitur in actis capituli provincialis provinciae Provinciae Carcassonae celebrati anno 1293; cf. DOUAIS l.c. pag. 380.